

Pendedahan perintah persaingan dalam pertumbuhan ekonomi



PENGERUSI Suruhanjaya Persaingan Brunei Darussalam, Yang Berhormat Nik Hafimi binti Abdul Haadii hadir sama di Sesi Dialog Persaingan bertajuk 'Peranan Perintah Persaingan di dalam Pertumbuhan Ekonomi' yang diadakan di Universiti Islam Sultan Sharif Ali (UNISSA).

Siaran Akhbar dan Foto :
Suruhanjaya Persaingan Brunei Darussalam

BANDAR SERI BEGAWAN, Jumaat, 17 April. - Persaingan merupakan komponen penting dalam pertumbuhan ekonomi. Perkara ini dibangkitkan dalam Sesi Dialog Persaingan bertajuk 'Peranan Perintah Persaingan di dalam Pertumbuhan Ekonomi' yang diadakan di Universiti Islam Sultan Sharif Ali (UNISSA) dan Universiti Brunei Darussalam (UBD) pada awal tahun ini.

Sesi dialog yang dianjurkan oleh Sekretariat Eksekutif Suruhanjaya Persaingan Brunei Darussalam itu bertujuan untuk memberi kesedaran mengenai konsep persaingan dalam operasi pasaran yang berfungsi dengan baik, dan memperkenalkan mengenai peranan perintah persaingan dalam mempromosi peluang perniagaan dan seterusnya melahirkan pasaran yang adil.

Sesi dialog juga dihasratkan

untuk memberi inspirasi dan merangsang minat para mahasiswa, mahasiswi dan akademia dari UNISSA dan UBD untuk menjalankan penyelidikan di bidang perundangan dan dasar persaingan mengambil kira kesesuaian dan kepentingan bidang ini dalam mencapai visi ekonomi jangka panjang Negara Brunei Darussalam iaitu ekonomi yang dinamik dan berdaya tahan.

Hadir pada sesi-sesi dialog berkenaan adalah Pengerusi Suruhanjaya Persaingan Brunei Darussalam, Yang Berhormat Nik Hafimi binti Abdul Haadii. Turut hadir bagi Sesi Dialog bersama Universiti Brunei Darussalam ialah Ahli Suruhanjaya Persaingan Brunei Darussalam, Dr. Joyce Teo Siew Yean, Penolong Naib Canselor dan Naib Presiden (Hal Ehwat Global), Universiti Brunei

Darussalam.

Sesi dimulakan dengan taklimat yang disampaikan oleh pakar persaingan dan mantan Ketua Dasar Persaingan dan Pengguna di United Nations Conference on Trade and Development (UNCTAD), Dr. Hassan Qaqaya. Beliau juga merupakan Rakan Senior di Melbourne Law School, University of Melbourne di dalam bidang Dasar Perdagangan Antarabangsa dan Persaingan. Ini disusuli dengan pengenalan mengenai perkembangan Perintah Persaingan yang disampaikan oleh Sekretariat Eksekutif Suruhanjaya Persaingan Brunei Darussalam.

Dr. Hassan Qaqaya mengongsikan bahawa persaingan adalah suatu proses dalam mencapai matlamat kecekapan pasaran. Pelaksanaan dasar dan perundangan persaingan yang berkesan akan melahirkan peniaga yang inovatif dan produktif, yang bersaing secara adil, dan seterusnya menawarkan barangan dan perkhidmatan pada harga yang kompetitif kepada pengguna.

Bagi membolehkan persaingan mencapai potensi dalam menyumbang kepada pertumbuhan ekonomi, adalah penting juga untuk mempunyai dasar-dasar yang koheren dengan prinsip persaingan. Ke arah mendorong *local start-ups* dalam kalangan inkubator keusahawanan UBD, Dr. Hassan Qaqaya menekankan perlunya untuk berhati-hati dalam mengendali maklumat perniagaan kerana perkongsian maklumat komersil yang sensitif boleh menimbulkan ancaman kepada persaingan.

Penerangan mengenai skop dan larangan-larangan utama Perintah Persaingan dikongsikan oleh Sekretariat Eksekutif Suruhanjaya Persaingan Brunei Darussalam.

Larangan pertama iaitu Perjanjian Anti-Persaingan, juga dikenali sebagai kartel, dikuatkuasakan pada awal tahun ini. Kartel merujuk kepada perjanjian di antara dua atau lebih peniaga untuk menetapkan harga,

membahagikan pasaran, meniadakan bekalan, menipu bidaan (kolusif tender).

Sekretariat Eksekutif turut menggalakkan pihak universiti untuk menyertai Virtual ASEAN Competition Research Centre (<https://aseancompetition.org/research/>) yang menyediakan platform kajian dalam bidang persaingan.

Turut menyertai Sesi Dialog bersama UBD selaku penceramah jemputan ialah Penasihat Undang-Undang Kanan dari Indonesia Competition Commission, Tuan Mohammad Reza.

Tuan Mohammad Reza, melalui perbincangan forum di dalam sesi berkenaan mengongsikan pengalaman Indonesia dalam menguatkuasakan perundangan persaingan di peringkat awal pelaksanaannya, dengan tumpuan diberikan kepada kolusif tender.

Sesi diakhiri dengan perbincangan yang aktif bersama mahasiswa dan mahasiswi, antara lain menyentuh topik mengenai pengenalan Perintah Persaingan dan impak persaingan dalam ekonomi digital.

Sesi Dialog masing-masing mengambil tempat di bangunan UNISSA dan UBD, dihadiri oleh lebih daripada 50 orang terdiri dari mahasiswa dan mahasiswi dalam bidang perundangan, ekonomi, kewangan dan perdagangan, serta akademia dan warga pentadbir yang berkenaan.

Sekretariat Eksekutif Suruhanjaya Persaingan boleh dihubungi melalui e-mel brunei.competition@jpes.gov.bn atau talian +673 2233344 sambungan 230 / 341 / 343 bagi sebarang pertanyaan lanjut mengenai dan permohonan taklimat Perintah Persaingan.

Hadapi COVID-19 dengan segala usaha, langkah tanpa hilang punca

Dari muka 7

"Khususnya dalam situasi kita menghadapi COVID-19 ini, tidakkah patut bagi kita mendongak banyak-banyak ke langit berdoa untuk memohon belas kasihan Allah?" tegas Yang Berhormat Pehin.

Sehubungan itu, Yang Berhormat Pehin menjelaskan bahawa Jabatan Mufti Kerajaan, Jabatan Perdana Menteri, turut sama-sama menyediakan beberapa doa, zikir dan beberapa ayat Al-Quran untuk dibaca, sambil memasang niat kepada Allah, semoga dengan membaca doa dan zikir serta ayat-ayat ini, Allah akan kabulkan hajat kita untuk menolok wabak COVID-19.

Doa-doa dan zikir-zikir serta ayat-ayat itu, jelasnya lagi sengaja dipilih yang mudah-mudah sahaja supaya senang dicerna.

Doa-doa, zikir-zikir serta ayat-ayat yang dimaksudkan itu ada termuat di dalam buku terbitan terbaharu Jabatan Mufti Kerajaan, Jabatan Perdana Menteri bertajuk, 'COVID-19: Apa Kata Mufti?'. Buku tersebut adalah adaptasi daripada ceramah khas Yang Berhormat Pehin bertajuk 'Apa Kata Mufti Tentang COVID-19 (Siri Pertama)' yang disiarkan di RTB pada 27 Mac 2020 yang lalu, dibukukan dengan dibahagikan kepada tiga bab iaitu Bab 1 bertajuk 'Masyarakat Bertanya Mufti Menjawab', Bab 2 bertajuk 'COVID-19 Menurut Pandangan Islam', dan Bab 3 iaitu tambahan khas bagi ceramah tersebut bertajuk 'Zikir Menghadapi Pelbagai Bencana dan Wabak'.

Projek Ikhlas 12.0 serlah keprihatinan masyarakat

Oleh: Wan Mohamad Sahran Wan Ahmadi
Foto: Ihsan Persatuan Bulan Sabit Merah

BANDAR SERI BEGAWAN, Jumaat, 17 April. - Projek Ikhlas 12.0, Menyulam Kasih Ramadan anjuran Persatuan Bulan Sabit Merah Negara Brunei Darussalam akan diadakan pada 19 April 2020 ini.

Sehubungan itu, pihak persatuan berharap orang ramai yang berkesediaan untuk tampil dalam sama-sama menghulurkan sumbangan berbentuk barangan keperluan harian seperti beras, tepung, minyak masak, gula, makanan ringan, malah mereka juga menerima baucar barangan dari pasar raya.

Presiden persatuan, Awang Haji Muhammad Suhaimi Haji Ibrahim ketika ditemu bual menjelaskan, orang ramai yang hendak menyumbangkan derma barangan tersebut bolehlah datang

menyerahkan secara pandu lalu (*drive-thru*) di Ibu Pejabat Persatuan Bulan Sabit Merah Negara Brunei Darussalam di Kawasan Letak Kereta, Pejabat Pos Bunut iaitu di belakang Stesen Minyak Shell Bunut. Penyerahan tersebut katanya, akan bermula dari jam 8.00 pagi sehingga 5.00 petang.

Mengulas tujuan projek tersebut, beliau menjelaskan bahawa barang-barangan yang diterima itu nanti akan disumbangkan kepada keluarga-keluarga yang kurang berkemampuan di negara ini termasuk golongan asnaf fakir miskin, asnaf muafaf daif, warga emas yang bersendirian serta orang yang berkeperluan khas.

Selain itu, sumbangan turut disedekahkan kepada keluarga-keluarga pesakit

COVID-19 yang sedang menjalani kuarantin di kediaman masing-masing.

Beliau seterusnya berkata bahawa sumbangan ini diselenggarakan bagi sama-sama menyambut kedatangan bulan suci Ramadan yang akan menjelma tidak lama lagi. Tambahnya, inisiatif yang disokong oleh para sukarelawan persatuan ini, diharapkan dapat membantu pihak Kerajaan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam dalam menangani isu kemaslahatan asnaf fakir miskin dan mereka yang memerlukan.

Persatuan ini memang aktif dalam mengungaykahkan tiga hingga empat projek ikhlas, di antaranya Projek Ikhlas Kembali ke Sekolah pada setiap bulan Disember, Projek Ikhlas Menyulam Kasih Ramadan yang diadakan setiap bulan Ramadan dan Hari Raya Aidilfitri. Manakala

Projek Ikhlas Khusus diselenggarakan jika ada musibah seperti banjir kilat, kebakaran rumah dan bencana-bencana alam yang lain.

Menerusi Projek Ikhlas ini juga, pihak persatuan juga berupaya menyediakan BRC Food Aid bertujuan menyediakan bantuan makanan asasi pada bila-bila masa diperlukan oleh masyarakat yang memerlukan tidak kira siapa dan dalam keadaan apa sekalipun.

Manakala School Aid juga disediakan untuk membantu kanak-kanak terutama pelajar di pelbagai peringkat dari rendah ke institusi pengajian tinggi yang memerlukan peralatan persekolahan.

"Seperti lazimnya, Persatuan Bulan Sabit Merah Negara Brunei Darussalam di keempat cawangan daerah mempunyai daftar senarai nama penerima yang terdiri dari golongan asnaf fakir miskin dan asnaf muafaf dan yang berkeperluan. Walau



PRESIDEN Persatuan Bulan Sabit Merah Negara Brunei Darussalam, Awang Haji Muhammad Suhaimi Haji Ibrahim.

bagaimanapun dari semasa ke semasa menerusi Food Aid boleh diagihkan kepada mereka yang memerlukan," katanya lagi.

Selaku sebuah masyarakat yang prihatin, kita digalakkan untuk sama-sama menyokong serta menghulurkan sumbangan demi kebajikan mereka yang memerlukan kerana tangan yang memberi itu adalah lebih baik apatah lagi dengan kedatangan bulan Ramadan ini, segala usaha dan sumbangan akan diberikan rahmat dengan pahala yang berlipat ganda.